

Rapport presidial dil cussegl pastoral Trun per mauns dalla radunonza dalla Pleiv s. Martin, dils 7 da matg 2025

Preziau signur president
Preziada suprastonza
Preziau sur dr. Tomasz Piotr Drwal
Preziadas parochianas e preziai parochians

Bungen prend'jeu la caschun d'orientar la hodierna radunonza sur dil curriu e passau el cussegl pastoral.

A caschun dalla sesida dils 21 da matg 2024 ei il cussegl pastoral seconstitutius.

Al cussegl pastoral fan part:

Mathias Bundi	president
Sur Tomasz Piotr Drwal	plevon
Olivia Pfister	actuara
Claudia Bundi	cassiera
Andriu Demont	
Angelo Cavegn	
Beat Hosang	
Clau Scherrer	
Claudia Küttel	
Corina Petschen	
Crista Pelican	
Giusep Bundi	
Isabelle Defuns	
Marcus Schmed	
Mäggi Della Valle	
Rilana Cadruvi	
Toni Pfister	

Il cussegl pastoral ha a caschun da sia emprema sesida filau empauet vid l'organisaziun. Ils ressorts ein vegni occupai cun las persunas responsablas sco suonda:

Ressort	Cuntegn	Persunal Responsabla
Liturgia	La liturgia cumpeggia tuttas fuormas da survetsch divin, oraziun e cant, simbolis, sacraments e benedicziuns, sco era vestgius ed utensils che vegnan duvrai el survetsch divin. - o messas da famiglia - o fiastas - comuniun e creisma - o devoziuns - o survetsch divin dil plaid - o musica e cant per embellir fiastas - o Glisch da Betlehem / pasch avon Nadal - o canzuns avon messa / Selegra	Isabelle Defuns
Diaconia	Sut diaconia capeschan ins tut ils aspects dils survetschs als concarstgauns che schabegian en connex cun la baselgia. - o visetas en casas da tgira - o visetas ed occurenzas en casa s.Martin - o viseta a persunas sur 85 onns	Crista Pelican
Annunziaziun	Sut annunziaziun capin nus il far paleis il plaid da Diu. - o contact cun igl augsegner - o persuna da contact cussegliaziun fegl parochial - o messa cun uncziun	Mathias Bundi
Cuminonza	La cuminonza ligia ils carstgauns in cun l'auter. Jesus ei era buca viandaus persuls. - o aperitivs (dumengi'alva, creisma, perdanonzas, di dalla mumma,) - o tgira ed agid dad usits e tradiziuns, sco tier processziuns – mirar per glieud ed esser presents per “direger” dir la successiun - o vendita da candeilas da Pastgas - o organisaziun il di da suppa - o organisaziun messa campestra - o accziuns spezialas - o cantar retgs (Olivia)	Corina Petschen

Tenor artechel 3 dil regulativ vertent ein igl intent e las finamiras dil cussegl pastoral fixadas sco sonda:

Art. 3 Intent e finamiras

Il cussegl pastoral ei in organ ecclesiastic, el qual parochianas e parochians s'engaschan per ina stretga collaboraziun denter la pleiv e la vischnaunca da Trun.

Il cussegl pastoral collaborescha cul plevon e cusseglia quel en tuts fatgs da pastoraziun ed organisaziun parochiala. Ils commembers dallas gruppas s'occupeschan – mintgin e mintgina tenor ses duns – cun in ni plirs dils dus pensums fundamentals dalla Baselgia e lavur pastorala. Quels pensums ein:

- *Liturgia e diaconia*
- *Annunziaziun e cuminonza.*

Nus havein sediscurriu da rudien sur digl intent, sur dils pensums e las finamiras dil cussegl pastoral.

Denter auter han las damondas

- tgei ein ils basegns da nossas parochianas e nos parochians
- tgei capesch'ins ozildi sut pastoraziun ed accumpignament
- tgei vegn pretendiu dalla pastoraziun
- tgei accumpignament vegn giavischau
- tgei sa la baselgia porscher alla cuminonza
- drova ei la baselgia per scaffir e viver cuminonza
- tgei purschidas ein bunas ed apreziadas e tgeininas astgan vegnir adattadas
- eav.

fatschentau nies gremi. Damondas ch'ei buca semplas da rispunder. Damondas che mintgin da nus sa tschentar a sesez ed era rispunder per sesez.

Ina dallas damondas ei denton era «tgei sai jeu sco singul porscher alla baselgia ed alla cuminonza».

Nus vesin, il cussegl pastoral sesenta buca mo sco in gremi dapli ella organisaziun dalla pleiv. Il cussegl pastoral less vegnir sentius e vesius sco ligiom denter parochianas e parochians ed ils responsabels dalla pleiv e dalla pastoraziun. Nus lessan segidar ella formaziun da nossa cuminonza, segirar, francar e promover tala. Nus lessan sengaschar tier la evaluziun dils basegns e giavischs da nossa cuminonza dad oz e vegnenta.

Nies giavisch ei pia da segidar e collaborar cun tuts funcziunaris, gremis ed acturs per ina buna e sauna cuminonza.

Lubi aunc a mi entgins plaids tier tradiziuns.

Tgei ein tradiziuns?

Ei dat plirs zitats tier tradiziuns, sco per exempel:

- Tradiziun ei buca il mantener e conservar dalla tschendra, mobein il dar vinavon la flomma.
- La tradiziun ei ina latiarna. Ins sa semplamein setener vid tala ni era duvrar ella per sclarir la via.
- Tradiziuns ston ins viver, ei drova leutier in bien cor ed in saun spért e sutut engaschi.

Il cussegl pastoral ei memedamein sedaus giu empauet cun las tradiziuns. En nossa pleiv dad ei pliras tradiziuns che vegnan buca vividas pli. Talas ein vegnidas messas sin cruna ni schizun bandischadas giun tschaler ni si surcombras en in stgir cantun ed han cun temps si ina grossa cozza da puorla per che gie negin vesi pli ella e vegni sin l'idea da prender neunavon, activar e schar reviver ella pli.

Forsa haveis vus viu, saviu seperschuader sez ni forse era mo udiu, che nus lessan puspei schar renescher ina ni l'otra tradiziun. Biars da vus prendan mintgon part alla fiasta da s. Placi a Mustér. Ina bellezza fiasta cun gronda tradiziun e folclora. Avon biars biars onns deva ei era ina fiasta cun ina tala tempra cheu tier nus. La perdanonza dil num da Maria a Nossadunna dalla Glisch veva pli u meins il medem character festiv sco la fiasta da s. Placi. Nus lessan empruar da destadar empauet la fiasta dil num da Maria ord la sien. Gia igl onn vargau ei quei succediu cun puspei baghegiar si la tribuna sco antruras, activar la laupia dalla casa pervenda, fixar ina nova ruta per la processiu cun in bi liug d'oraziun e benedicziun. Sco antruras havein nus era giu saviu pladir sur Camenzind sco concelebrant e predicatur da fiasta. Nus havein sentiu il niev spért e la cuntentientscha dils pelegrins da puspei activar tenor pusseivladads la fiasta dil num da Maria. Deplorablamein ha l'aura buca susteniu tut il previu, aschia che nus havein stutiu dislocar e cuntinuar cun ina part dalla s. messa ella baselgia da Nossadunna dalla Glisch. Ch'ei drova

pauc, mo ina buna flexibilitad ed ina purziun improvisaziun per scaffir cuminonza ha il fatg mussau, ch'igl aperitiv ei, muort la schliatta aura, vegnius purschius en baselgia. Ina biala ed emperneivla atmosfera ei sedada e bunas discussiuns ein naschidas en quei bi sanctuari.

Tier las ulteriuras fiastas da baselgia ed ulteriuras s. messas ni occurenzas, sco per exempel

- Sontgilcrest
- Perdanonza a Zignau
- Perdanonza a Schlans
- Perdanonza a Trun
- Messa campestra
- Di dallas mummas
- Vendita da candeilas duront ils dis da Pastgas
- Purtar la glisch da Bethlehem
- Survetschs divin dil plaid
- Messas da scola
- Rorate
- Messa da Nadal per famiglias
- Cantar dils s. retgs
- Visetas a senioras e seniors en las casas da tgira ed attempai

ein commemoras e commembers dil cussegl pastoral s'engaschai sco usitau, seigi quei organisatoric, activ sco era cun organiser e porscher differents aperitivs.

Bugen engraz'jeu zun fetg a Trun Turissem per il sponsorig dils aperitivs per las perdanonzas da Schlans e Trun sco era per il di dallas mummas cheu a Trun.

Jeu cuntinueschel gest cun engraziar:

Jeu engraziel allas concomebras ed als concomembers dil cussegl pastoral per lur grond engaschi e sustegn.

Allas catachetas in grond engraziament per la grondiusa lavur per nos affons, per las scolaras ed ils scolars.

Dieus paghi a sur Tomasz ed als representants dalla pleiv per la collaboraziun e l'udida per nos fatgs e giavischs.

Sco gia detg, nies giavisch ei da segidar e collaborar cun tuts funcziunaris, gremis ed acturs per ina buna e sauna cuminonza.

En quei senn terminesch'jeu miu rapport presidial ed engraziel per l'attenziun.

Per il cussegl pastoral
Mathias Bundi, president